

如是等一切世界，诸佛世尊，常住在世。是诸世尊，当慈念我：若我此生、若我前生，从无始生死以来，所作众罪，若自作、若教他作、见作随喜；若塔、若僧、若四方僧物，若自取、若教他取、见取随喜；五无间罪，若自作、若教他作、见作随喜；十不善道，若自作、若教他作、见作随喜……所作罪障，或有

覆藏、或不覆藏，应堕地狱、饿鬼、畜生，诸余恶趣、边地下贱，及箴戾车，如是等处。所作罪障，今皆忏悔。（一拜）

今诸佛世尊，当证知我、当忆念我。我复于诸佛世尊前，作如是言：若我此生、若我余生，曾行布施、或守净戒，乃至施与畜生，一抔之食；或修净行，所有善根；成就众生，所有善根；修行菩提，所有善根；及无上智，所有善

根。一切合集，校计筹量，皆悉回向阿耨多罗三藐三菩提。如过去、未来、现在诸佛，所作回向，我亦如是回向。众罪皆忏悔，诸福尽随喜；及请佛功德，愿成无上智。去、来、现在佛，于众生最胜。无量功德海，我今皈命礼。（一拜）

所有十方世界中，三世一切人师子。

我以清净身语意，一切徧礼尽无余。  
普贤行愿威神力，普现一切如来前。  
一身复现刹尘身，一一徧礼刹尘佛。（一拜）  
于一尘中尘数佛，各处菩萨众会中。  
无尽法界尘亦然，深信诸佛皆充满。  
各以一切音声海，普出无尽妙言辞。  
尽于未来一切劫，赞佛甚深功德海。（一拜）  
以诸最胜妙华鬘(mán)，伎乐涂香及伞盖。

如是最胜庄严具，我以供养诸如来。  
最胜衣服最胜香，末香烧香与灯烛。  
一一皆如妙高聚，我悉供养诸如来。  
我以广大胜解心，深信一切三世佛。  
悉以普贤行愿力，普徧供养诸如来。（一拜）  
我昔所造诸恶业，皆由无始贪瞋痴。  
从身语意之所生，一切我今皆忏悔。（一拜）  
十方一切诸众生，二乘有学及无学。

一切如来与菩萨，所有功德皆随喜。（一拜）  
十方所有世间灯，最初成就菩提者。  
我今一切皆劝请，转于无上妙法轮。（一拜）  
诸佛若欲示涅槃，我悉至诚而劝请。  
唯愿久住刹尘劫，利乐一切诸众生。（一拜）  
所有礼赞供养福，请佛住世转法轮。  
随喜忏悔诸善根，回向众生及佛道。（一拜）  
愿将以此胜功德，回向无上真法界。

性相佛法及僧伽，二谛融通三昧印。  
如是无量功德海，我今皆悉尽回向。  
所有众生身口意，见惑弹谤我法等。  
如是一切诸业障，悉皆消灭尽无余。  
念念智周于法界，广度众生皆不退。  
乃至虚空世界尽，众生及业烦恼尽。  
如是四法广无边，愿今回向亦如是。（一拜）  
南无大行普贤菩萨。（三称毕起立）